

[Augsburg], 20. August 1570

An Theodor Zwinger

UB Basel, Fr. Gr. II 27, Nr. 268.

S. Etsi nuper admodum, Clariss[ime] vir, D[omine] et amice colende, literis tuis respondi, meq[ue] posthac philosophiam tuam meis nugis non toties interpellaturum putaui: tamen officij ratio penè cogit, et perspecta humanitas tua facit, vt non inuitus ad te dem literas, quoties res postulat. Simon Ostermannus, Lauinganae scholae Rector, Sturmij popularis et amicus, ad vos proficiscitur laureolae adipiscendae gratia: atque in animo habet, mensem vnum atque alterum, certis de causis, isthic commorari. Putat autem suis rationibus accommodatum fore, si apud Iurisconsultum aliquem cibum capere, eiusq[ue] libris vti liceat. In quo si eum adiuuare potueris (potes autem haud dubiè) rogo vt vel ipsius, viri praestantis, vel mea causa id facias. Quod mihi pergratum erit, vt et caetera tua officia plurima: quibus gratiam referendi occasionem et facultatem deesse mihi, molestè fero. Vale. 1570. 20 Augosti.

Hiero[nymus] Wolfius
Tuus.